

الأحمـد 2008-10-19

415- التدريب عن بعد: الإشراف على العلاج النفسي (22)

عن الطبيعة البشرية وخطوات وجرة تنظيمها

د. أحمد علي: يمكن أعمل تحديث لحالة كنت اتكلمت عليها هنا مرتين.

د. يحيى: طبعاً، هوا احنا لينا شغلة غير كده! بس تفكرنا بيها الأول

د. أحمد علي: هي بنت، حضرتك محولها لى عندها 26 سنة، هي مساعد باحث، ووالدها طبيب، أختها الصغيرة لسه فى ثانوية عامة وأمها قاعدة فى البيت. كانت مرت بصدمة كدا، زى خبرة وعدت مع خطيب، ما كملتشى معاها، بس زى ما تكون اكتشفت من خلال الخبرة دى إنها عندها برود، لقت نفسها مش قادرة تتجاوب مع خطيبها، مع إنها سابت نفسها ليه، بس مش سيان كامل، وبعدين لما اكتشفت مشاعرها دى، حست إن مستقبلها حا يبقى صعب جداً مع الرجالة، إزاي حاتحط فى حاجة ذى كده وهى كده، المهم ما حصلشى نصيب إنها تكمل الخطوبة، وبعدين دخلت بعدها بمدة مش طويلة فى مرحلة ثانية وبدأ يجيلها تخيلات (فانتازى) على واحدة صاحبيتها، وحست ياستثارة جنسية ناحية صاحبيتها دى، وقعدت الحكاية مدة لحد ماراحت اجازه طويلة شوية من الشغل، الحكاية خفت.

د. يحيى: أظن أنا فاكّر الحالة دى شوية، فيه حاجة ثانية ظهرت؟

د. أحمد علي: أيوه، كان موازى للحكاية دى إنها تقضى وقت كبير قدام الكمبيوتر، مش بتتفرج على حاجات مش هية، لكن كانت الحكاية دى بتسليها بس بتاخذ وقت جامد، المهم هي انتظمت فى العلاج، وده خلاها تنتظم فى شغلها وماشى الحال، وزاد تقدير الناس لشغلها.

د. يحيى: فين المشكلة الجديدة اللى انت عايز تنكلم فيها دلوقتي بقى؟

د. أحمد علي: هي كانت راحت مصيف مع أهلها فى اسكندرية ورجعت فيها نقلة كويسة، أنا متصور كده، مثلاً بتقول لى إنها حاسة بلذة جامدة فى الشغل، وإنها حسّت إن الحياة متغيرة.

د. يحيى: طيب ما هو ذا تمام التمام، فيه إيه بقى ؟ إنت بتشوفها بقالك قد إيه؟

د. أحمد على: حوالى سنة دلوقتى

د. يحيى: برافو عليك، مش ده تغيير نوعى إيجابى، هو مين بيحس بلذة فى الشغل اليومين دول؟

د. أحمد على: أنا مش مستريح قوى، يعنى فيه حاجات كثيرة هى مفقدها لسه، صحيح هى عمالة تشتغل أحسن وبتجيب الشغل فى البيت وبتحس وهى بتنجز إنها مبسوطه، فأنا بصراحة سألتها عن القديم، وبالذات عن حته التخييلات إياها دى، فهى بتقول لى بقالى فترة من ساعة النقلة دى مافيش الحركة اللى كانت جواها ناحية البننت دى أو أى بنت ثانية وكده، يعنى وقفت خالص، بس فى نفس الوقت ما فيش قبول بالنسبة للخطاب اللى ممكن يجولها، عندها لسه قلق وخايقة بدرجة شاعلان.

د. يحيى: السؤال ؟ فىن السؤال؟

د. أحمد على: أنا باعمل تحديث حالة أولاً، بس للزملاء وخضرتك، يعنى بالخص المشوار بتاع البننت والمسيرة بتاعها ماشية ازاي، وبانقل لخضرتك دلوقتى إني أنا عندي تخوف، والسؤال هو: هل أزق فى اتجاه إنها تقبل اللى بيتقدمولها برغم شعورها ده؟ يعنى هل الوقت مناسب؟ أنا حاسس طول الوقت إني عاوز أزق بشكل سريع، عشان يبقى فيه حد فى حياتها، ونشوف الدنيا حاتمشى ازاي، يعنى بصراحة فضولى إني أنا أشوف رد فعلها يبقى إيه؟ فهل أكمل فى الزق؟ ولا أعمل إيه؟

د. يحيى: برضه أنا بافتكر الحالة أكثر واكثر، وبصراحة أنا عايز أحترم فيك رؤيتك لنفسك، وبالذات لحكاية الفضول دى، هوه مش فضول قوى، ما تظلمشى نفسك، إحنا مش بنتفرج على عيائنا، إنت عايز تعرف هى وصلت لحد فىن بعد الخبرة اللى شككتها فى نفسها، فعوضتها بالفانتازيا اللى حكيت لنا عنها، وده حقك، لأ دا مش بس حقك دا واجبك، خصوصاً بعد حكاية اللذة فى الشغل، لحسن يكون الشغل هوا راخر تعويض على حساب تنمية مسئوليتها نحو علاقة حقيقية.

د. أحمد على: بصراحة أيوه، يعنى أنا عندي اهتمام أعرف هى النقلة الإيجابية فى الشغل اللى بقت تلاقى فيه نفسها ولذة وكلام من ده، هى دى بديل، ولا نقلة تطور حقيقى؟

د. يحيى: عندك حق، خصوصاً إن دى مشكلة عامة شوية فى مجتمعنا بفرصه المحدودة، زى ما قلنا البننت لما بتوصل 29 يبقى فى حرج من كذا ناحية.

د. أحمد على: هى عندها 26 سنة بس

د. يحيى: ما انا عارف، أنا باقولك زى ما باقول دايماً، إن البننت لما بتوصل يعنى 29 سنة بيقى دخلنا منطقة الحرج، فيه حرج داخلي عادة البننت ما تعترفشى بيه، وفيه حرج

خارجي اجتماعي ممكن الأهل يقلقوا من ناحيته، ولا ده عيب ولا ده غلط، يبقى الزقة من حيث المبدأ مشروعة، لأنك جزء من هذا المجتمع المتحفظ، وانت عارف اللي بنكره دايما إن الطبيب والد، يبقى الزق مشروع، إنما الاستعجال مش مشروع، إنت قدمت لنا الحالة دى قبل كده، قلت لك إنى أنا فاكرها، وتحديث الاستشارة حسب تطور الحالة جزء مهم جدا فى الإشراف وفى العلاج، حتى لو حانعيد الكلام، إنت فاكركم اللي بنكره عمال على بطال إن العلاج النفسى "وقت" و"توقيت"، time and timing وفى الحالة دى فيه، برغم التقدم الواضح فى مسيرة العلاج، فيه ما يستدعى نظرة أعمق وإعادة حسابات بحرص جيد، عندك هنا الرغبة الجنسية المثلية، ولو على مستوى الخيال، يمكن تشير إن البنات أصبح عندها شك فى قدرتها عمل علاقة حقيقية مسئولة مع الرجل، أى رجل، خصوصا بعد مسألة البرود والسيان اللي قالته، إالى مرت فيها البنية دى مع خطيبها فى الخطوبة إالى انفركشت، النقلات هنا مهمة: من خطوبة، لخيالات مثلية، للذة فى العمل، مع استمرار علاقة علاجية لمدة سنة بانتظام، أظن إنت فى وقفة جيدة، وفى وقت مناسب إنك تعمل حاجة، ويمكن ده إالى بتسميه "زق"، وبتشك فى نفسك إنها فرجة أو حب استطلاع، ولا هوا حب استطلاع ولا حاجة، دى مسئولية طبيب أب معالج يا أخصى.

إنت عملت عمل جيد، بس زى ما تكون هى سجتك بعيد عن الجنس، وعن الشغل فى حقها فى إطلاق سراح مشاعرها الطبيعية فى الاتجاه الطبيعى، سواء بخيالها المثلية أو بنجاحاتها فى الشغل، فإنت حسيت بده، وعابيز تزقها يمكن الناحية الثانية قبل ما تشوف عمق المسألة، هل هى قبلت نفسها كأنثى لها رغبة جنسية رغم خبرة البرود الباكورة، ولا لأ، ثم إن البرود نفسه ممكن يكون إشارة إلى قوة حركية الجنس فى داخلها بما يحتاج معاه إلى "لأه" جامدة تظهر على شكل برود.

أنت عملت عمل جيد إنك نجحت تحافظ على علاقة علاجية بناءة، من غير ما تتوقفوا كثير عند حكاية الطرح transference وإنها تتعلق بىك بديل عن خيالها، وعن تصور برودها، الانتظام هنا فى العلاج مع التغير الطيب ده، حتى لو كان مجرد غطاء مرحلى، ده كله بفضل العلاج الجاد فعلا. يبقى من حقه بعد سنة تقول آن الأوان نخطى خطوة أوسع نحو الواقع، فتجيبك رغبة إنك تزقها ناحية قبول علاقة مع رجل بيتقدم لها، أو بيتعرف عليها كخطوة أولى، ده نوع من اختبار لمستوى تانى وصل إليه العلاج، وده أوانه حسب المعلومات اللي انت قلتها، بس هو برضه مسئولية زى أى مسئولية أب ناصح حريص على بنته، وفى نفس الوقت محترم لغتها، وبيعاش مراحل تغييرها أول بأول، سنة علاج منتظم ده وقت مش قليل فى السن دى، وانت جواك بيحسبها يمكن غصين عنك، تجتمع الأبوة، مع المجتمع، مع التقاليد، كل ده هو اللي بيزقك مش انت اللي بتزقها عشان تفرج، يا شيخ حرام تظلم نفسك.

فى نفس الوقت ما تخافشى من الكلام اللي انا قتله دلوقتى عن سن 29 اللي بعده بسنتين تلاقى البنات نفسها فى العقد الرابع،

الحمد لله ما حدث بياخذ باله إن 31 سنة هي بداية العقد الرابع، إنما رابع إيه وخامس إيه، لازم إحنا بنزق نبقى متطمنين في نفس الوقت إن الفرص موجودة في أى وقت، والبينات في مصر دلوقتى بقوا مريحين، أنا مش عارف ليه، دايمًا يقولوا إن فيه احتمالات أفضل، منين ما اعرفشى، بس لازم نخترم التغيرات اللى جارية في المجتمع، الحسبة صعبة، بس حانعمل إيه.

د. أحمد على: يعنى أعمل إيه ؟

د. يحيى: الله!! ما انت عملت وتعمل، إنت عايز تعمل إيه أكثر من كده؟ سواء إنت أو حساباتك اللى جواك عمالة توزن الأبوة والمجتمع والتقاليد والوقت في ناحيه، وعمالة تحسب نضج البنت وجدعتها ورؤيتها والتزامها الناحية الثانية.

د. أحمد على: يعنى أستنى كده لحد إمتى؟

د. يحيى: لأ بقى، إنت مش مستنى ولا حاجة، أنا رأيي إنك تهدى اللعب شوية ضد خوفك الداخلى عليها، وضد هماسك الأبوى، واللى يطمئنك هوا انتظامها، وشغلها، واختفاء الخيالات اياها، ولو ظاهرياً، أظن دى كلها حاجات إيجابية، ولا إيه؟

د. أحمد على: بس انا قلقان برضه من حكاية ميولها الجنسية المثلية دى.

د. يحيى: أولاً إقلق زى ما امنت عايز، لكن يا أخى مش يمكن يكون ده دليل على إن الكبت عندها ما عادشى بالعنف اللى جعلها بارده في الأول، خصوصاً إن الميول دى مجرد ميول، لم تختير، ثم يا أخى مش إحنا متفقين إننا ما نتحمشى قوى للاستقطاب، وإننا نقبل الطبيعة البشرية بكل تاريخها، وبعدين نحاول ننظمها من خلال السماح والدعم والانضباط المنظم واحدة واحدة، مسألة الميول الجنسية المثلية مش ضرورى تبقى جنسية حاف كده، يمكن هي شكل من أشكال التعبير عن الحاجة إلى "موضوع"، إلى "آخر"، وما تنساش إن الخبرة الأولانية كان فيها إحباط وكلام من ده، مش يمكن الخيال قال لك يجرب نفسه الناحية الثانية، يبقى الحركة مطلوبة حتى لو كان الموضوع - مؤقتاً - مش هوه.

د. أحمد على: يعنى إيه ؟

د. يحيى: مش عارف أقول لك إيه، المهم إنت ماشى صح والسلام، ما هو إحنا لازم نقبل الطبيعة كلها على بعضها، وبعدين ننظمها، يعنى مثلاً زى ما قلنا قبل كده: إنت تحب كل الناس، كل النساء، وبعدين تحب واحدة بالنيابة عن كل الحريم بالأصالة عن نفسها وبالنيابة عن كل الناس، شيء شديد الصعوبة، وغير مقبول إعلانه على مستوى الواقع، تصور كده لو بتقول لواحدة، "أنا باحبك بالأصالة عن نفسك وبالنيابة عن بقية نساء العالم"، في الغالب حاتقلع اللى في رجلها وتوضبك، بس نعمل إيه الصبح صح، وادى إحنا بنتعلم، وإذا فيه تحديث تاني ورابع، أدى إحنا موجودين، حانروح فين؟

د. أحمد على: ربنا يسهل.